

# Leta Houwan Pita I Leli

## Baaba Houwan

Pita toto Yesu wana apostolo leta ya i leli. Nige i papatuna panuwa maisena ya elana, yaa i patuna toabulilek bolo hi miminaa polobins nimala panuna gamwaliyaa: Pontas, Galatiya, Kapadosiya, Eisiya ge Bitiniya (1:1). Labi bolo o lan ebe hi miminaa panuwa Teki (Turkey) ana abalogugui gamwanaa.

Yesu wana yaomal enaa i ola baliman teti paib i mowasi inoke Pita leta ya i leli. Saugena o Loma wali kin alana Nilo (Nero) toabulilek i papalomwan-agil. Inoke leta ya ana nuwatu bwabwatana te Pita i ba nihi palahikan lomwan elana ni ola Yesu (2:18-25; 3:13-22; 4:12-19). I ola al, i panuwahikagil Yehoba wana mulolu kaiwena (5:12), yaka i ba pagasisel nihi pwabwabwalena-agil wali pagan gegewena ni sapu (1:15), ge ginol waiwaisana nihi awaawaginol (2:12; 3:16). Inoke ala ba pagasisi hi gewi ta pwawal leta ya gamwanaa.

**1** <sup>1</sup>Nau Pita, Yesu Keliso wana apostolo, leta ya ya leli ge ya patuna komiu Yehoba wana hilihili gamagaliliyau eliyamiu, bolo ku mibwabwali panayawiya ge ku miwaliwali labi Pontas, Galatiya, Kapadosiya, Eisiya ge Bitiniya elal. <sup>2</sup>Yehoba Tamala totona wana nuwatu eliyana i hilemiu ge Yayaluwana i pwabwabwalena-agimiu, nuwana Yesu Keliso nuku toulil ge saliyana eliyana wami gegi ni ul yoho.

Ya awanun sauga gegewena Yehoba ni muloluagimiu ge wana nuwa laumwal atemiu ni pakalaopop.<sup>a</sup>

## Ta Yaliyaya Nabi Yehoba wana Pwamwal kaiwena

<sup>3</sup>Wala Babala Yesu Keliso Tamana, Yehoba ta tobalan! Wana atilomwan kaiwela i bwata nabi yaka i abila pavavaluna kaiwena Yesu Keliso i lutem yaomala, inoke ginebi wala atimatuwa ta matamatan bugul mihomihotina kaiwena. <sup>4</sup>I abila pavavaluna inoke mulolu toto i lovivina-an kaiwela bwaliga ta ahe, iya nige ni mwamwabulum, nige ni nanak, nige ni momowasi, iyoho Yehoba i matahikan labulabumwa kaiwemiu.<sup>b</sup> <sup>5</sup>Ge wami abulilek kaiwena Yehoba wana gasisi i gagana

<sup>a</sup> 1:2 Loma 8:29; 2Tes 2:13    <sup>b</sup> 1:4 Kols 1:12

pipinagimiu ana siga pwamwal nuku ahe, pwamwal o iyaka i lovivina-an sauga mowamowasena elana ni ginol.<sup>c</sup>

<sup>6</sup>Bugul bolo ya kaiweliya inoke ku yaliyaya nabi, bwagana sauga ya pulowan tomaha ge tomaha hi nem eliyamiu ge sauga kakaubwaina elana hi palomwanagimiu.<sup>d</sup> <sup>7</sup>Pulowan ya hi gan eliyamiu inoke hi pamasal wami abulilek i tunahot. Gold nige i mimihot, yaa ginaha elana hi ton ni wayui yaka mumusana hi ahek yoho. Kamwasa o eliyana gold hi labose inoke gold enona hot hi ahe. He i ola al te, Yehoba wami abulilek, iya gold ana wasawasa i bwata lake, ni labose ge ni patunahot. Inoke sauga Yesu Keliso ni sikalim, ni tobalagimiu, ni awa wawaisi-agimiu ge ni awa wasawasa-agimiu.<sup>e</sup> <sup>8</sup>Bwagana nige sauga etega ku kikite, yaa ku nunuwana-an. Bwagana sauga ya nige ku kikite, yaa ku abulilek-an yaka yaliyaya ku kalaopopwi, yaliyaya o i ola labulabum ana yaliyaya ge gamwamiu i pakevakeva, nige bosowaina nuku baaba kaiwena.<sup>f</sup> <sup>9</sup>Ku yaliyaya i ola o kaiwena wami abulilek enona pwamwal ku pwawa Yehoba elana.

<sup>10</sup>Pwamwal ya ana sapu kaiwena inoke palopitau hi loya nabi, bolo sauga houhouwena elana hi palopisai ge Yehoba wana mulolu eliyamiu hi wasaan.<sup>g</sup> <sup>11</sup>Keliso Yayaluwana i miminaa eliyalil ge i pankitel Keliso ni lomwan houwan yaka abwe wana wasawasa ni pwawa. Inoke heliya hi loya nuwaliya nihi atena hauna sauga ni gan ge wana masal ga ni ola.<sup>h</sup> <sup>12</sup>Yehoba i pamasal eliyalil te bugul toto hi palopisai nige totoliya kaiweliya i oola, yaa komiu kaiwemi. Inoke sauga ya bugul o wasana iyaka ku hago, kaiwena topapaatena Wasa Waiwaisana iyaka hi papaatena-an eliyamiu Yayaluwa Bwabwalena wana gasisi elana, iya Yehoba i patuna i neem labulabumwa. I ola al aneloseyau ge nuwaliya bugul bolo ya ali sapu nihi atena.

### Wami Pagan Gegewena Ni Sapu

<sup>13</sup>Inoke bahi wami nuwatu nuku papakenu yaa nuku patuwalali, ge wami pagan nuku matahikan. Sauga Yesu Keliso ni sikalim, Yehoba wana mulolu elana ni pwamwalimiu, inoke sauga ya ginebi wami atimatuwa hot nuku matamatan pwamwal o kaiwena. <sup>14</sup>Yehoba nuku henapuan, kaiwena natunau komiu. Bahi wami pagan ni oola pagan toto valila ku giginol, sauga komiu iyoho nige ya ga Wasa Waiwaisana ku hahago ge ku aatena.<sup>i</sup> <sup>15</sup>Yaa nuku pwabwabwalena-agimiu, wami pagan gegewena ni sapu, ni ola te toto i yogaagimiu i

---

<sup>c</sup> 1:5 Diyo 10:28; 17:11   <sup>d</sup> 1:6 1Pit 5:10; Yem 1:2   <sup>e</sup> 1:7 BaPa 17:3; Sak 13:9; Mal 3:3; Yem 1:3   <sup>f</sup> 1:8 Diyo 20:29; 2Kol 5:7   <sup>g</sup> 1:10 Mat 13:16-17   <sup>h</sup> 1:11 Same 22; Ais 53; Luke 24:26-27   <sup>i</sup> 1:14 Loma 12:2; Epe 2:3; 4:17-18

bwabwalena. <sup>16</sup>Kaiwena Buki Bwabwalena elana Yehoba i ba, “Nuku pwabwabwalena-agimiu kaiwena nau ya bwabwalena.”<sup>j</sup>

<sup>17</sup>Sauga ebo ku awanun Yehoba elana, ku awa taman elana, ge iya abwe gamagalau gegewel ni pakotil paolaolaek, ni golugoluwa maisena ge maisena wana ginol elana. Inoke yawalimiu miminana panayawiya, Yehoba nuku awatawan ginebi ge wami lovakun.<sup>k</sup> <sup>18</sup>Kaiwena ku atena mola bwabwatana eliyana iya i pwamolamiu pasikalem yawal toto nige enona waiwaisana i gagan elana, toto i neem tubumiyau elal. Mola bwabwatana ya nige i oola bugul bolo abwe nihi nak, lolana silba ge gold. <sup>19</sup>Yaa Keliso i yaomal i ola sipi nige ana kasiyebwa, nige nakina etega i gagan, inoke saliyana waiwaisana elana Yehoba i pwamolamiu pasikalem nak elana.<sup>l</sup> <sup>20</sup>Yehoba i hile mulaa abwe panayawi i ginol, yaa sauga ya, sauga mowamowasena, abwe i masal kaiwemiu.<sup>m</sup> <sup>21</sup>Inoke Keliso eliyana wami abulilek i gan Yehoba elana. Yehoba i palutem yaomala ge i pawasawasa, yaka komiu ku abulilek Yehoba elana ge ginebi wami atimatuwa ku matamatan hauna ni ginol kaiwemiu.<sup>n</sup>

<sup>22</sup>Wasa tutunahotina ku henapuan yaka eliyana atemiu ku ul, enowana te ku nunuwana tunahot talimiyau elal. Inoke atemiu bwalibwaligena elana nuku penunuwana-agimiu hoti.<sup>o</sup> <sup>23</sup>Kaiwena Yehoba yawal vavaluna i pewa ge yawal vavaluna ya nige i neneem pwatum toto abwe ni nak. Yawal vavaluna ya i neem pwatum toto nige sauga etega ni nanak, iya Yehoba wana baaba, baaba yawalina gaganina ge mihomihotina. <sup>24</sup>He i ola Buki Bwabwalena ana baaba:

Gamagalau gegewel hi ola mwawin,  
ge wali waisi i ola mwawin o lanina.

Mwawin i yakiwa, yaka lanina i sogu,<sup>p</sup>

<sup>25</sup>yaa Yehoba wana baaba i mihot.

Baaba ya heiya te Wasa Waiwaisana toto hi papaatena-an eliyamiu.

**2** <sup>1</sup>Inoke ginol nanakina gegewena, lokalokakawi, lamwa pulowan, loloba ge baaba nanakina gegewena nuku teliek emiwa.<sup>q</sup> <sup>2</sup>Wawaya melumelu i wawalem hinana hulina kaiwena. Inoke ni ola al to nuku wawalem hul waiwaisana kaiwena toto yayaluwamiu ni paim, inoke eliyana nuku bwatabwata ana abapwamowasi mwal nuku pwawa. <sup>3</sup>Nuku ola o kaiwena iyaka ku atena ge amnana ku anbose age Babala i waisi.<sup>r</sup>

### Komiu Hilihili Gamagaliliyau

<sup>4</sup>Ku nem Babala Yeisu elana, iya pat yawalina gaganina toto gamagalau hi awa nanakan ge hi towani, yaa Yehoba i hile kaiwena

j 1:16 Lib 11:44-45; Mat 5:48 k 1:17 Loma 2:11; Pan 2:23 l 1:19 Tuw 20:28; Hib 9:12-14

m 1:20 Epe 1:4 n 1:21 Diyo 14:6; Loma 5:1-2 o 1:22 Diyo 13:34; Loma 12:10

p 1:24 Ais 40:6-8 q 2:1 Epe 4:22; Yem 1:21 r 2:3 Same 34:8

i waisi. <sup>5</sup>Nuku talamwagimiu nuku ola pat yawalina gaganina inoke eliyamiu Yehoba wana Limi, toto Yayaluwa Bwabwalena wana abamina, ni ginola. Yaka Limi ya elana Yehoba wana tuwalali bwabwalena nuku ginol, inoke yayaluwamiwa powon waiwaisana nuku ginol Yehoba elana kaiwena ku minaa Yeisu Keliso eliyana. <sup>6</sup>Nuku nem Babala Yeisu elana kaiwena Buki Bwabwalena elana Yehoba i ba, “Pat waiwaisana ya hile, inoke ya teli Saiyoni+ elana ge i tabwa limi ana ekahiyana kona elana. Inoke henala ni melteli elana nige ni pupuluwawi.”<sup>t</sup>

<sup>7</sup>Pat waiwaisana i waisa te komiu eliyamiu bolo iyaka ku melteli elana. Yaa gamagalau bolo nige hi aabulilek baliya te Buki Bwabwalena i ba, “Pat toto totaltal hi awa nanakan ge hi towani, Yehoba iyaka i ahe limi ana kokola gasigasisena i ginoliya”<sup>u</sup> <sup>8</sup>ge “gamagalau aeliya hi tupaana pat ya elana ge hi sogu.” Hi sogu kaiwena Wasa Waiwaisana nige hi aabulilek-an. He Yehoba wana nuwatu kaiweliya i ola to.<sup>y</sup>

<sup>9</sup>Yaa komiu hilihili gamagaliliyau, Yehoba, iya wami kin, wana tuwalali bwabwalena ku awaawaginol, ge komiu boda bwabwalena Yehoba elana. Komiu Yehoba wana gamagalau, i hilemiu inoke wana waisi nuku lowasawasa-an. Iya i yogaagimiu ku tagilem gogouwa ge ku ulutuk mwananalina waiwaisana elana.<sup>w</sup> <sup>10</sup>Valila komiu nige Yehoba wana gamagalau i oola, yaa sauga ya komiu wana gamagalau; valila Yehoba nige i aatilomwan-agimiu, yaa sauga ya ku minaa wana atilomwan gamwanaa.<sup>x</sup>

### Wami Pagan Ni Sapu ge Tologugui Nuku Awatauwagil

<sup>11</sup>No heliyamwau, komiu ku mibwabwali panayawiya, inoke ya ba pagasisi eliyamiu bahi nuku oolak nuwatu nanakina bolo tuwamiu nuwana elal, kaiwena sauga gegewena hi lohavyan yayaluwamiu elana.<sup>y</sup>

<sup>12</sup>Wami pagan ni sapu bolo nige Yehoba hi aabulilek-an gamwaliyaa, inoke bwagana nihi baaba kaiwemi tage komiu nak ana toawaginol, wami ginol waiwaisana nihi kite yaka Yehoba nihi tobalan wana lan nem elana.<sup>z</sup>

<sup>13</sup>Wala Babala kaiwena inoke tologugui gegewel bolo hi logugui-agila wali logugui nuku henapuan: ebo kin, iya logugui i kauni,<sup>a</sup> <sup>14</sup>o ebo tologugui bolo i teel gamagalau nanakil ali lahi nihi pek ge gamagalau waiwaisal nihi tobalagil. <sup>15</sup>Nuku ginol ola o, kaiwena Yehoba nuwana ginol waiwaisana nuku awaawaginol inoke gamagalau sisigal bolo hi awa naknakagimiu bwabwage nihi kite yaka nihi mikekei ya.<sup>b</sup> <sup>16</sup>Tunahot komiu nige gamagal etega wana totuwalali loloyowanina i oola, yaa bahi

<sup>s</sup> 2:5 Epe 2:21-22; Pan 1:6    <sup>t</sup> 2:6 Ais 28:16; Epe 2:20    <sup>u</sup> 2:7 Same 118:22

<sup>v</sup> 2:8 Ais 8:14-15    <sup>w</sup> 2:9 Log 7:6; 14:2; Ais 9:2; Tai 2:14; Tuw 26:18; Epe 5:8

<sup>x</sup> 2:10 Hos 2:23    <sup>y</sup> 2:11 Gal 5:17,24    <sup>z</sup> 2:12 Mat 5:16    <sup>a</sup> 2:13 Tai 3:1    <sup>b</sup> 2:15 1Pit 3:16

nuwatu o kaiwena ge nuku babaa, “Ebo nuwama, i bosowaima ya pagan nanakina naha ginol.” Yawalimiu ni ola te komiu Yehoba wana totuwalali loloyowanina. <sup>17</sup>Gamagalau gegewel nuku awatauwagil, wami pan toabulilek nuku nunuwana-agil, Yehoba nuku lovakunan, ge kin nuku awatauwan.<sup>c</sup>

### Ta Palahikan Lomwan elana Ni Ola Yeisu

<sup>18</sup>Komiu totuwalali, wami tonowakau wali logugui nuku henapuan ge nuku awatauwagil, nige tage bolo wali pagan i meimei ge i waisi awawal, yaa bolo wali logugui i gasisi al ge.<sup>d</sup> <sup>19</sup>Ami abatobal te ebo hi palomwanagimiu bwabwage, yaka Yehoba ku nuwahikan inoke ku palahikan ya. <sup>20</sup>Hauna ana waisi ebo nak nuku ginol ge nihi nibihimiu, inoke nuku palahikan? Yaa ebo waisi nuku ginol ge nihi palomwanagimiu inoke nuku palahikan, he ami abatobal to Yehoba matanaa.<sup>e</sup>

<sup>21</sup>Lomwan ololana o ana palahikan kaiwena te Yehoba i yogaagimiu. He Keliso lomwan i pwawa kaiwemiu, inoke abapankite i teli eliyamiu ge aena mulina nuku toulil.<sup>f</sup> <sup>22</sup>Iya nige gegi etega i giginol, nige ba kakawi etega i tatagila awanaa.<sup>g</sup> <sup>23</sup>Hi ba panapanak-an, yaa nige i babaa lahi. Hi palomwanan, yaa nige i babaa hugahuga elal, yaa gegewena i pek ya Yehoba ni logugui-an, iya Toyatala sasapona.<sup>h</sup> <sup>24</sup>Iya tuwana elana wala gegi i kalivai ge i ha kolos elana, inoke gegi paganina elana ta mowasi ge pagan sasapona elana ta minaa. Iya hi nibihi ge hi howa, inoke ana gau mulina elana molu ku pwawa.<sup>i</sup> <sup>25</sup>Valila komiu ku ola sipi bolo hi tatayaomal, yaa sauga ya Tomatahikan Sipi i ahemiu pasikal elana, iya yaluwamiu ana tomatahikan waiwaisana.<sup>j</sup>

### Toalolon Meluyowau ge Melubolau Baliya

**3** <sup>1-2</sup>I ola al, komiu toalolon meluyowau lagomiyau wali logugui nuku henapuan. He lagomiyau melubolau enuna Yehoba wana baaba nige hi hahago, yaa wali logugui nuku henapuan, inoke wami pagan waiwaisana kaiwena abwe nuku ahel nihi nem Yehoba nihi abulilek-an. Nige nuku babaa elal, yaa wami henapu ge wami awatauwan nihi kite inoke nihi abulilek.<sup>k</sup> <sup>3</sup>Bahi nuku nuwanuwatu tuwamiu toto noleleya ana isela kaiwena, ololana kokowamiu nuku huwal sibasiba-an, bobot ali awa waiwaisal nuku pin o ebo kaliko waiwaisal nuku galoil.<sup>l</sup> <sup>4</sup>Yaa ami isela ni neem awaa, yaluwamiu ni meimei ge nuku hanalau. Isela toto ya nige ni nanak ge i waisi nabi Yehoba matanaa. <sup>5</sup>Isela toto ya heiya te

<sup>c</sup> 2:17 Loma 12:10   <sup>d</sup> 2:18 Epe 6:5   <sup>e</sup> 2:20 1Pit 3:14,17   <sup>f</sup> 2:21 Mat 16:24;  
Diyo 13:15   <sup>g</sup> 2:22 Ais 53:9   <sup>h</sup> 2:23 Ais 53:7; 1Pit 3:9   <sup>i</sup> 2:24 Loma 6:11; Ais 53:5-6  
<sup>j</sup> 2:25 Isik 34:5-6; Mat 9:36; Diyo 10:14; Hib 13:20-21   <sup>k</sup> 3:1-2 Epe 5:22   <sup>l</sup> 3:3 1Tim 2:9

evenakau houhouwel bolo Yehoba hi abulilek-an hi ahe ge hi paisela-agil. Heliya lagoliyau wali logugui hi henapuan, <sup>6</sup>i ola Sela, iya Abalahama anana i hago ge i awa babala-an. Komiu evenakau, pagan waiwaisana nuku awaawaginol, yaka Yehoba ana mel nuku teli ge bahi lolovakun, inoke komiu nuku ola Sela natunau.<sup>m</sup>

<sup>7</sup>I ola al komiu toalolon melubolau, iyaka ku atena hauna pagan Yehoba nuwana nuku ginol, inoke wami pagan ni ola to lagomiyau elal. Nuku nuwahikan komiu ku gasisi, lagomiyau nige hi gagasisi, ge yawal vavaluna, iya Yehoba wana mulolu, nihi ahe ni ola ya komiu, inoke lagomiyau nuku awatauagil. Nuku ginol ola o, inoke wami pagan bahi wami awanun Yehoba elana ni kakaus.<sup>n</sup>

### Toabulilek Nihi Mibubun

<sup>8</sup>Nuwatu bolo ya baunanagil na kin pamaisena ge na ba ola hiwe: wami nuwatu ni maisena, alomiyau nuku atilomwan-agil, wami pan toabulilek nuku nunuwana-agil, wami pagan ni meimei ge nuku hanalau.

<sup>9</sup>Bolo hi ginol panak eliyamiu, bahi pagan nanakina nuku giginol lahe elal; ge bolo hi ba panapanak-agimiu, bahi nuku ba panapanak-agil, yaa nuku awanun Yehoba ni ba muloluagil. Ya ba ola o, kaiwena Yehoba i yogaagimiu pagan lololana o nuku ginol, inoke abwe ni muloluagimiu.

<sup>10</sup>He i ola Buki Bwabwalena ana baaba i ba:

Henala ebo nuwana miwaiwaisana ni pwawa  
ge yawalina ni yaliyaliyaya,  
awana ni matahikan bahi  
baaba nanakina ni babaunan,  
ge wana baaba ni  
matahikan bahi ni lokalokakawi.<sup>o</sup>

<sup>11</sup>Ginol nanakina ana en ni  
pek yaka pagan waiwaisana ni ginol,  
ni labose nabiyau ga ni  
ola inoke alonau ge alonau nihi mibubun.

<sup>12</sup>Kaiwena Babala matana i lihikanek tosasapol elal,  
ge wali awanun i hago,  
yaa bolo pagan nanakina hi  
awaawaginol nige i yaliyaya kaiweliya.

### Wala Pagan Waiwaisana kaiwena Lomwan Ta Pwawa

<sup>13</sup>Ebo ginol waiwaisana nuku awaawaginol, tabam nige gamagal etega ni bwewegimiu. <sup>14</sup>Yaa bwagana ebo wami pagan waiwaisana kaiwena lomwan nuku pwawa, he komiu toyaliyaliyaya. Gamagalau bahi nuku

<sup>m</sup> 3:6 Aba 18:12    <sup>n</sup> 3:7 Epe 5:25    <sup>o</sup> 3:10 Same 34:12-16

lolovakun-agil o ebo nuku nuwanuwatu kaiweliya,<sup>p</sup> 15 yaa atemiwa Keliso nuku awatauwan ge nuku awa babala-an. Nuku lovivina-agimiu, yaka sauga ebo gamagal etega ni nelimiu ni ba, “Ga i ola ge ginebi wami atimatuwa ku abulilek?” inoke puna nuku pamasal elal. 16 Yaa nuku ginol alona wami hanalau ge wami awatauwan. Ge wami pagan ni sapu ni ola pagan toto ku atena Yehoba nuwana, inoke sauga ebo gamagalau nihi ba panapanak-agimiu ge komiu Yeisu ana tototoulil wami ginol waiwaisana nihi awa nanakan, wali baaba o kaiwena abwe nihi puluwawi.<sup>q</sup> 17 Ebo Yehoba wana nuwatu ni ola yaka wami pagan waiwaisana kaiwena lomwan nuku pwawa, he i waisi to. Yaa ebo wami pagan nanakina kaiwena lomwan nuku pwawa, he i nak to.

18 He Keliso al ge lomwan i pwawa: i yaomal pamaisena ya wala gegi kaiwena. Iya tosapu i yaomal kila togegi kaiwela, inoke ni ahela ta nok Yehoba elana. Tuwana i yaomal, yaa abwe Yayaluwa Bwabwalena wana gasisi elana i lut al. 19 Ge Yayaluwa Bwabwalena wana gasisi elana i nok i na i papaatena yayaluwa elal, bolo hi miminaa dela. 20 Heliya valila Yehoba anana nige hi hahago, sauga toto Nowa waga i awaawaginol ge Yehoba gamagalau wali sauga i talamwan wali gegi ana en nihi pek. Gamagalau nige hi gegewi, ali gewi eit ya, hi ulutuk waga o gamwanaa, inoke wewel elana hi otaota ge mwal hi pwawa.<sup>r</sup> 21 He wewel o i ola ba kakanun etega, inoke sauga ya komiu al ge mwal nuku pwawa sauga ebo wewel elana nuku babitaiso. Babitaiso nige i oola tage tuwala elana biki ta ul yoho, yaa ta atena wala gegi Yehoba iyaka i ul yoho inoke ta batelela iya elana. Sauga ta babitaiso inoke Yehoba i pwamwalila Yeisu Keliso wana lut al kaiwena, 22 iya iyaka i ha labulabumwa ge i minaa Yehoba nimana labena awonaa, yaka aneloseyau ge yayaluwa gegewel bolo wali gasisi gaganil hi minaa wana logugui gabulanaa.

#### Nuku Talamwagimiu Yehoba wana Nuwatu elana

**4** 1 Keliso tuwana elana lomwan i pwawa, inoke wana kamwasa nuku ahe ge nuku lovivina-agimiu lomwan al nuku pwawa ni ola iya. Kaiwena ebo etega tuwana elana lomwan ni pwawa Keliso alana kaiwena, iya iyaka nige ni miminek gegi paganina elana.<sup>s</sup> 2 Inoke yawalina miminana panayawiya nige ni tatalamwanek panayawi paganina elana, yaa ni talamwanek Yehoba wana nuwatu elana. 3 Valila wami ginol i ola gamagalau bolo Yehoba nige hi aabulilek-an wali ginol. Ho besena to, inoke sauga ya Yehoba wana nuwatu nuku ginol. Valila yawalimiu ku payaomalek hebabala ge ganawal paganina elana, ku im kokona, ami boda elana ku loloimwim yaka abwe neganega paganina

<sup>p</sup> 3:14 Ais 8:12-13; Mat 5:10; 1Pit 2:20; 4:14    <sup>q</sup> 3:16 1Pit 2:12    <sup>r</sup> 3:20 Aba 6-7

<sup>s</sup> 4:1 Loma 6:2,7

ku awaawaginol, ge ku kululuek yabowaine kakakawel elal.<sup>t</sup> <sup>4</sup> Sauga ya bolo Yehoba nige hi aabulilek-an ateliya i youagimiu, kaiwena nige al alomiyau ku totoalon ge ku giginol bwagabwaga, inoke hi ba panapanak-agimiu. <sup>5</sup> Yaa abwe ali kot ni gan Yehoba matanaa, kaiwena sauga kekeisi abwe tomolu ge toaliga ni pakotil.<sup>u</sup> <sup>6</sup> He Yeisu wasana waiwaisana hi papaatena-an gamagalau elal bolo iyaka abwe hi aliga, puna kaiwena, bwagana tuwaliya elana lahi hi pwawa toto gamagalau gegewela ta pwawa inoke hi yaomal, he yayaluwaliya elana yawal hot nihi pwawa, yawal toto Yehoba elana.

### Ala Gabom Ta Patuwalali

<sup>7</sup> Panayawi ge bugul gegewena kelaubwa nihi mowasi. Inoke wami nuwatu ni sapu ge wami pagan nuku matahikan, inoke bosowaimiu nuku awaawanun Yehoba elana.<sup>v</sup> <sup>8</sup> Bugul maisena ana nuwatu i bwata hot, heiya te nuku penununuwana bubun maisena ge maisena eliyamiu, kaiwena ebo avala ta nunuwana-an, he wana gegi eliyala iyaka ta nuwaehik to.<sup>w</sup> <sup>9</sup> Ginebi wami yaliyaya alomiyau nuku yoga pahel nihi minaa wami limiya, ge bahi nuku baaba kaiweliya.<sup>x</sup> <sup>10</sup> Yayaluwa Bwabwalena i muloluagila tomaha ge tomaha ala gabom i pem, inoke nuku ola Yehoba wana mulolu ana tomatahikan waiwaisal ge maisena ge maisena ami gabom nuku patuwalali alomiyau nuku label.<sup>y</sup> <sup>11</sup> Henala ebo ni papaatena, wana papaatena ni ola Yehoba totona i baaba. Henala ebo ni tabwa totuwalali gamagalau ni label, ni tuwalali alona ge gasisi toto Yehoba i pek elana. Wami ginol ni ola o, inoke gamagalau wami ginol gegewena nihi kite yaka Yeisu Keliso alana elana Yehoba nihi tobalan, iya towasawasa ge iya togasisi sauga gegewena nige ni momowasi. Ibwe. I ola.

### Ebo Lomwan Ta Pwawa kaiwena Kila Keliso wana Gamagalau

<sup>12</sup> No heliyamwau, sauga ya lomwan ku pwawa yaka wami abulilek i labose. Yaa bahi nuwamiu nuku aahe ge nuku babaa, “I bwe i ola o?” <sup>13</sup> Yaa nuku yaliyaya-an te Keliso wana lomwan komiu al ge ku lomwani. Inoke sauga alona ge wana wasawasa ni nem, yaka abwe nuku yaliyaya nabiyani hot.<sup>z</sup> <sup>14</sup> Ebo Keliso alana kaiwena ge hi ba panapanak-agimiu, nuku yaliyaya-an ya, kaiwena i pamasal Yayaluwa toto wana wasawasa gaganina, Yehoba Yayaluwana, i minaa eliyamiu.<sup>a</sup> <sup>15</sup> Bahi tage komiu etegana ni taulol, ebo ni kaoma, ebo logugui ni leke, o ebo ni logugui likalika, ge inoke lahena lomwan ni pwawa. <sup>16</sup> Yaa ebo komiu

<sup>t</sup> 4:3 Epe 2:2-3   <sup>u</sup> 4:5 Tuw 10:42   <sup>v</sup> 4:7 Loma 13:11-12   <sup>w</sup> 4:8 1Pit 1:22   <sup>x</sup> 4:9 Hib 13:2  
<sup>y</sup> 4:10-11 Loma 12:6-8   <sup>z</sup> 4:13 Tuw 5:41; Yem 1:2; 1Pit 1:6-7   <sup>a</sup> 4:14 1Pit 2:20



Kelisitiyani<sup>b</sup> ge inoke lomwan nuku pwawa, bahi nuku pupuluwawi, yaa Yehoba nuku tobalan kaiwena alan ya hi tun pwatanewa eliyamii.

<sup>17</sup>He yatala ana sauga telipuna iyaka i vin, yaka Yehoba kila wana boda i lalabosela houwan. Ge ebo Yehoba i tetelipunaa eliyala, inoke sauga ebo bolo Wasana Waiwaisana nige hi aabulilek-an ni pakotil, nasi ga ni ola eliyalil? Nasi ali lahi ni pulowan hot! <sup>18</sup>I ola Buki Bwabwalena ana baaba, “Ebo tosapu lomwan ge pulowan enaa abwe pwamwal nihi pwawa, he hauna ni gan togegi elal bolo Yehoba nige hi aabulilek-an?”<sup>c</sup> <sup>19</sup>Inoke bolo Yehoba wana nuwatu kaiwena ge lomwan hi pwawa, waisi paganina nihi ginol hikahikani ge nihi talamwagil ali Toginol nimanaa ni matahikagil, iya sauga gegewena i giginol i ola wana bateli.

### Ekelesiya ana Tohouwa ge Toekelesiya ali Ba Pagasisi

**5** <sup>1</sup>Komiu ekelesiya ana tohouwa, nuwau ami ba pagasisi na baunan. Nau al ge ekelesiya ana tohouwa etega, nau Keliso wana lomwan ya kite, ge sauga Keliso wana wasawasa Yehoba ni pamasal gamagalau gegewel elal, na minaa wana wasawasa gamwanaa. Ami ba pagasisi i ola hiwe: <sup>2</sup>nuku ola sipi ana tomatahikan ge Yehoba wana boda bolo i pewa nuku matahikagil. Bahi tage ami powapowala ya ge nuku mamatahikagil, yaa alomiu wami yaliyaya ni ola Yehoba wana nuwatu. Bahi nuku aawa molamola, yaa nuku talamwagimiu hoti nuku tuwalali kaiweliya.<sup>d</sup> <sup>3</sup>Bolo Yehoba i pewa ami matamatahikan, bahi wami logugui ni eelolol eliyalil, yaa nuku ola wali abagagayawa.<sup>e</sup> <sup>4</sup>Inoke sauga Tomatahikan Sipi wali Tobwabwatana ni nem, yaka wasawasa mihomihotina ni pewa eliyamii ni ola ami hanahana.

<sup>5</sup>I ola al, komiu hevalau wami tohouwa wali logugui nuku henapuan. Gamagalau gegewemiu, ginebi ge wami hanalau nuku totuwalali alomiyau elal, kaiwena Buki Bwabwalena i ba:

Bolo tohanaha Yehoba nige i yayaliyaya kaiweliya,  
yaa bolo hi hanalau i muloluagil.<sup>f</sup>

<sup>6</sup>Inoke nuku hanalau-agimiu Yehoba nimana gasigasisena gabulanaa, inoke sauga toto iya i lovivina-an abwe ni teli heyagimiu.<sup>g</sup> <sup>7</sup>Wami nuwatu pupulowanina gegewena nuku pek ni kalivai, kaiwena iya ami tonubwinubwi.<sup>h</sup>

<sup>8</sup>Nuku silawa ge nuku matahikagimiu bubun, kaiwena ami topihigelgel Seitani iya i ola kwasumu sosokana laiyoni, i nononawanawa ge i loyaloya nuwana gamagal etega ni tinon.<sup>i</sup> <sup>9</sup>Nuku talmilil gagasisi wami abulilek elana inoke nuku lohoveyan elana. Nuku nuwahikan

<sup>b</sup> 4:16 Alan “Kelisitiyani” ana sapu heiya “gamagalau Kelikelisol.” <sup>c</sup> 4:18 BaPa 11:31

<sup>d</sup> 5:2 Diyo 21:15-17; Tuw 20:28 <sup>e</sup> 5:3 2Kol 1:24; Pilp 3:17; Tai 2:7 <sup>f</sup> 5:5 Epe 5:21; Yem 4:6 <sup>g</sup> 5:6 Mat 23:12; Luke 14:11; Yem 4:10 <sup>h</sup> 5:7 Mat 6:25-30 <sup>i</sup> 5:8 1Tes 5:6

te panayawi labena gegewena elal, wami pan toabulilek heliya al ge lomwan hi pwawa i ola ya te komiu ku pwawa.<sup>j</sup>

<sup>10</sup>Yehoba, iya mulolu gegewena puna, i hilemiu nuku ulutuk wana wasawasa mihomihotina elana kaiwena ku minaa Keliso elana. Inoke sauga kakaubwaina ya te lomwan nuku pwawa yaka abwe ni abubunimiu nuku gasisi ge nige nuku lamwalamwaniu. <sup>11</sup>Yehoba wana gasisi ni mihot sauga gegewena nige ni momowasi. Ibwe. I ola.

### Baaba Mowamowasena

<sup>12</sup>Sailasa, iya ya atena talila waiwaisana bosowaina ana mel ta teli, i labeyau te wami leta kaukaubwana ya ya leli. Inoke eliyana Yehoba wana mulolu tutunahotina ya wasaan ge ya ba pagasisi eliyamiu nuku talmilil gagasisi mulolu o eliyana.<sup>k</sup>

<sup>13</sup>Talimiyau bolo ekelesiya Babiloni<sup>l</sup> elana, heliya al ge Yehoba i hilel, hi mulolu eliyamiu. I ola al Mak, iya i ola natu, i mulolu eliyamiu.<sup>m</sup>

<sup>14</sup>Nimamiu nuku paelu alomiyau elal ge nuku pemumulolu-agimiu, kaiwena ku nunuwana-agimiu to.

Komiu bolo ku minaa Keliso elana, ku gewigewi Yehoba wana nuwa laumwal atemiu ni pakalaopop.

---

<sup>j</sup> 5:9 Epe 6:11-13; Yem 4:7    <sup>k</sup> 5:12 Tuw 15:22,37-40; Tuw 12:2,25; 13:13    <sup>l</sup> 5:13 Babiloni, he tabam Loma bana, i ola wali ba kakanun etega.    <sup>m</sup> 5:13 2Tim 4:11